

*III. Справа зъ Соколки о пополненіи вшитеченства Семеномъ Проциковымъ сыномъ зъ вдовицею изъ же служебкою. Преписана слово въ слово, которая такъ ся въ собѣ маеть:*

Року 1683, месеца ноеврія 27 дня.

Предо мною Павломъ Олексенъкомъ, сотникомъ, Василемъ Котляромъ, атаманомъ наказнымъ, Иваномъ Матвѣвичомъ, войтомъ, и притомности врядовъ насъ былъ Василь Юсченъко, Матвѣй Торговицкий, Василь Матвѣвичъ и при многихъ людяхъ учтивыхъ, пришовши предъ насъ сама доброволне Вовдотия Сѣдаковна, вдова, пропоновала рѣчь свою устно и скаржилася въ тые слова: Мои ласкавии панове! мешкаламъ въ Процика Гончаренъка робою въ дому его, жона его взяла ма прясти въ домъ; тедымъ мешкаламъ часъ немалый и робыламъ, до чогомъ се умовила. Аже чого ткнулось, ижъ Процикъ Гончаренъко зъ самою къ Петру святому до Голтви на ярмарокъ поехалъ, а насъ съ Семеномъ и зъ малими дѣтми на господарствѣ покинули. Теды Семень, синъ Проциковъ, зо мною сталсе играть и жартовать, а далѣй мене такъ подвѣлъ и грѣхъ зо мною, яко изъ жоною до приезде старихъ строилъ; и старие приехали, то южъ того не пересталъ; старие ея попятъ и не чуютъ, а онъ ко мнѣ въ ноци придетъ и зо мною, такъ яко изъ жоною блудъ чинячи, мешкаеть, южъ мя за жону такъ полецаетъ, я ему до сихъ часъ во всемъ поволна была. Теды старие южъ постерегли и мене отъ себе отогнали, а я южъ и непорожна застаю, же южъ чую, що и дитына отъ Семена зачала южъ и ручками и ножками въ животъ шамотаетъ. А онъ мене сироту зъ ума звѣдши, и нѣчимъ одбываетъ. Я тилко Богу и вамъ оповѣщаю, а якъ дитину приведу, Процику въ хату его хочъ окномъ вкину, ижъ синъ его Семень вробылъ. Теды мы, вышъ спецификованный врядъ отъ Вовдѣ доброволное сознание слышачи, безъ всякихъ алтернатій, казалисмо тые слова до снадѣйшое уваги на врадъ записати, що есть и записано, нѣмъ тому слухный доводъ станеть.

За тое чужоложество самъ Процикъ Гончаренъко, визволяючи сына своего Семена, привѣлъ коня и отдалъ до двору полковничого. (Протокол. Полтав. полк. суда, л. 19 об.).

*IV. Справа о покрадене Климова Манченъкова коней Куриломъ Педорченкомъ, злодѣемъ явнымъ, не поеднокротне рознижъ часовъ, поданая намъ зъ Бѣликовъ и принятая до книгъ нашихъ мѣскихъ Полтавскихъ, которая такъ ся въ собѣ маеть:*

Року 1690, месеца генъвара 11 дня.

При насъ, старшинѣ городской Бѣлицкой, Ивану Сакуну, сотнику, Аньдрью Марченъку атаману городовому, Тимошу Доброненъку войту, Микитѣ Шимъченъку, бурмистру, оказалось злодѣйство на Курила Хве-